

裘慶元輯

秘本醫學叢書

上海書店

重樓玉鑰續編

重樓玉鑰續篇提要

喉科重樓玉鑰早已盛行於世習是科者罔不奉爲圭臬不知更有精當切用之續篇在也本書爲歙縣鄭氏祕藏蓋鄭氏之喉牙科名垂數世皆得力於此且正編爲僕人竊出流傳於世故續篇益加重視同治初年周君邦彥以數十青蚨得於舊書攤以非專科贈諸章社友之尊甫亦無暇流覽泊媳患喉科險症採用本書中方而瘳始共寶貴後歷次試驗無不立奏奇效

跋

丁巳之秋九月念六余妾洪氏忽然喉症乍起白大若錢寒熱交作手足如冰次早延醫服牛蒡甘桔而未解也再服病益進別延友人紫正地黃湯又延友人羌活大黃湯月至朔而命殂矣或曰此惡症也古無治法或曰此真證也百不一生予悲之天之酷人太甚也詰朝 樞扶叔祖慰我予具以告 叔祖曰燥也死於命非死於病也子悲何補哉夫醫者理也風勝濕火就燥燥虛火而非實火也子喻五行者也反生反尅知乎無水不生非土不養水燥則涸而木死木燥則枯而火死火燥則烈而土死土燥則崩而金死金燥則頑而水死生機熄矣其見症也不亦宜乎經曰燥以潤之不可潤也不死何待時誌之不敢忘越數日小女未週歲而症作即延治七日而滿口之白腐頓消成敗易勢得

失相反始信斯症之不惡也治有治法也證無真假也一生百生也我 叔祖之言不爽也今壬戌仲冬集稿成篋授予讀之竟其委清其源不覺言之娓娓道之津津此非一朝一夕之故其所由來漸矣其論確其見真其功深其心苦其論確故要言不煩其見真故取效甚速其功深其心苦則 叔祖之篤信好學也世之咄咄以爲惡症者不且共登衽席而享壽域乎哉

當時同證三人二俱不可死者竟六七日而偕亡惟小女未週歲而獨存吁不遇 樞扶叔祖命也居今思昔爲之盡然爰跋於後後深感一綫之生云爾

皆

嘉慶七年歲在壬戌孟冬月上浣雙橋蓮湖居士謹識

白纏喉叙

鄭子若溪聰明好學士也潛心於醫學有年矣其於喉證尤究心焉蓋喉科乃其家傳然其書特言實症而虛症未之及也至於白腐一證近日更多醫者罔察自作聰明不論色脈每作實證治之而天枉者不可勝數若溪心竊傷之自出手眼因辯證著方以闢其謬而病是證者咸登壽域書成持以示予予讀之不覺躍然因謂之曰善哉子能爲白腐證關一坦道而以虛燥立方子之功德遠矣蓋白者肺色也腐者腎臭也原非病也形而出之外則病矣白加腐則肺燥矣腐且白則腎枯矣既燥且枯子母俱敗不有以潤之補之而猶曰紫正敗毒則將持雌失雄棄陰負陽其不至於載胥及溺不止矣吾子之論是也藏之名山曷若傳之後世好生之德與人同之不亦善乎因書之以弁其簡端

重樓玉錦續編 叙

七十有六老人莘田吳守先紹中氏拜撰

自叙重樓玉鑑續編

先高祖赤山公(瀚)七代祖也性好堪輿精研軒岐淵源已久是故知醫代不乏人然未嘗輕言也 先大父詔齋公當賈盱豐時會閩人黃明生先生異授喉科治驗如神活人甚夥心竊慕焉因思利濟於是科爲最計與商之而先生不可其時 叔祖仰山公向 詔齋公曰窺先生之祕非禮莫能爲也於是具幣帛束金百兩負笈於先生之門先生曰予非吝而不傳實有因耳昔授受時曾立不傳之誓違之則主乏嗣旣誠於前何可背於後耶 仰山公曰今懇先生之祕者實存濟人之念耳如能廣以濟人卽先生自濟也先生何樂而不爲焉請熟籌之如是俯可出其書以授乃囑曰珍之 仰山公曰唯唯 詔齋公旋里命父伯輩咸究心焉凡患喉疾實症者依法療之無不神效而先生年

近六旬果無嗣而歿 仰山公攜遺像一幀而歸供奉於書室中由是數十年來活人甚廣後被僕人私竊其半貪利而售之於外遂至更相傳鈔家有其本邇來業是科者皆執此書爲圭臬焉(瀚)雖不敏未冠時性近醫及地理從續北曹素峯先生游至於醫學過庭之訓精醫諸友聆益良多於是遍歷楚豫江浙會稽蘇揚間獲異人奇方往往輒效又遇馬子從龍於吳山之大乘古剎馬氏曰不游名山大川不登山陰禹穴鳥足以言地理而醫亦然子知之乎須襟懷淡蕩領會山川靈秀於胸次便覺悠然而不局促融通而無固執矣信乎方子岫雲云予於痘疹之機括每從漢印中悟出新言也誠得此中三昧語耳非好奇之謂也蓋痘者豆也非毒也當其未感發之時無形可據夫何毒之有既發動透於肌膚雖形現於外尙未成漿猶未可執以爲毒也或成漿時方可以毒論然毒卽氣血也痘之起長貫漿收靨落痂全憑乎氣血陰陽凡血充氣足

則陰陽調暢能化毒載出營衛故應期而痊若血虛氣虧陰陽偏勝焉能斂毒達於肌肉况習俗從事於寒涼伐及無辜而氣血復爲所傷毒隨氣血散漫以致內陷變爲敗症莫可挽救是誰之責歟皆因執毒之義爲害也是以流毒日深牢不可破甯服寒涼而斃終無怨也至於喉科以及諸症總不離乎氣血陰陽表裏虛實耳余於壬子歲自漢歸來抱終天之恨無以爲計與三弟朝夕研醫互相討論以承家學忽忽間倏一紀不覺光陰之迅也因念年逾半百精力漸衰地理一道跋涉維艱而流水高山歎鍾期之難遇故將喉科歷年來辯明虛實寒熱之處一一詳言之俾後之習此者知有所導庶不致膠柱刻舟之誚以補是科之所未及云爾

時

大清嘉慶九年歲在甲子孟夏月上澣雙橋樞扶氏鄭瀚書於十琴軒之西窗

續重樓玉鑰自叙

喉科之書所見凡十有餘家或詳或略各有所長至若治驗神速莫如秘授三十六症自治療以來活人甚廣然未嘗論證與脈要之總是死法未爲盡善也余懼醫家各執祕授不知通變往往反因而誤事故與環川方子岫雲博採古今之書纂爲續編以補諸家之未備其中指示色脈辯別症因以至用藥加減之法至詳極慎醫者誠能遵而用之神而明之庶不致膠柱刻舟之誚其於仁術或未必無小補云

雙橋樞扶氏若溪鄭瀚識

重樓玉鑰續編序

歙縣西園鄭氏以喉牙科名歷世相傳實擅起死回生之能術而通乎神者矣顧甚居奇守秘聲價自高殊不知其所以炫世驚人擢盛名賺金錢者全藉重樓玉鑰一書而已也書分正續兩編正編早已盛行於世習是科者罔不奉爲圭臬盡皆謂爲完璧足以應用而有餘而弗料其更有玄妙之續編在也觀樞扶氏之自序言是書之珍秘得書之艱難至有不再他傳之誓固屬從前人務獨善不知道德之陋習蓋其靈驗可貴之價值實有倍於尋常之喉牙諸書者焉正編言爲僕人竊出展轉傳鈔致坊間亦得刊售續編之什襲珍藏當更較格外慎重矣余家所藏之冊係用桃花紙鈔訂者字跡惡劣而潦草裝訂粗率而顛錯一見可知爲乘機偷暇之所成折開印寫之情形猶宛在也原書經樞扶先生一再增輯特於喉症白腐專論加詳近今坊本陳修園醫書中及以外

有數種專言此症者殊皆不及此書之縝密妥當也此冊首頁有道光元年辛巳歲大呂月歛南昌溪吳季儒鈔十八字計其年月距嘉慶九年樞扶先生自序時纔十有七年正鄭氏鼎盛期間萬無沽售流行之理必屬至親密友偵知藏處如如姬盜兵符違王贖竹垞之故事以智誘計取而得之者無疑也同治初年兵燹方定我邑蓮川周丈邦彥以數十青蚨得此於裨販擔頭度置架間一未寓目以已習內科此屬非其所學也先君子萃庵公見而喜之假以歸涉閱一周謂之曰此鄭氏秘笈也喉牙口舌得此可以名家矣周丈頓悟急即索回越數歲家計益窘又值其子將續絃乃以此冊作贈而告借銀幣念番先君子慨然允之書遂爲我家有矣先君子豁達多能望隆鄉邑排紛解難應給不暇醫藥堪輿雖皆素嗜而迫於環境不克精專致此書亦從耽滯歷廿餘年末一試用也斯時先五兄石農挈眷居仁里岳家從其外舅程金門先生兼習儒

與醫學光緒甲午菊秋嫂氏徒嬰喉患先卽翁壻合治繼延歛東舍頭專科程炳文暨績城名醫葛巨川章儀廷仲貽諸先生診視濟濟一堂愈治愈劇奄然一息臥莫能興石農乃函致家中筱濤大姪備述病危商量後事尙欲秘弗與先祖母朱太宜人知恐其年高鍾愛有素致傷起居也筱濤稟諸先居子條爾憶及是書急命檢出專人星夜齎去相距四十里以酉正發亥末至矣方憂其經多延誤不及挽救復慮其治法少驗徒勞無功舉室旁皇擾攘達旦錯午使者回言至卽照書配藥煎服頭劑得效如神晨間再進一劑已刻已起坐索粥病去大半我動身時諄諄乞告堂上勿再記念某已霍然就瘳矣蓋其所採用祇養陰清燥湯神功丹二方而已於是乃共寶此書翁壻於數日中倩人各鈔二冊以備轉借之有失也嗣後患此者較多而愈可速里中有患者亦輒就先君子求診皆隨治而療焉戊戌仲春先君子捐館舍石農回里行道汽後歷游

宣城受聘豫章俱以善治喉名緣以此爲師承也余步石農之後懸壺七載喉牙疾患療愈百數實亦得此書之資益者也親友中習醫及好義者皆就索鈔無不如願以償之然余拙不自藏夙懷普濟思鈔傳之有限欲付梓而不能力與心違時興弗逮憾欣得裘吉生先生有徵刊醫書之盛舉此書可不患湮沒而其傳益廣矣豈非治牙喉科者又得一指迷之寶筏也哉前經手鈔副本寄呈先生懇與審定印入三三醫書旋蒙來札惠允且不棄荒陋贈閱報以訂交並弁言之是囑爰樂遵命叙其緣起與所關繫者若此蕪蕪筆禿冗複無當雖忝有附驥之榮其難免著糞之誚也夫

民國十四年歲次丑舊歷端五節績溪章洪均叔和甫謹識

秘本醫學叢書第十冊目錄

重樓玉論續編

暑症發源

傷寒論讀

徐渡漁先生醫案

藥徵續編

行軍方便便方

上池雜說 經目屢驗良方

重樓玉鑰續編

古欽樞扶氏若溪鄭瀚撰

皖績章洪均叔和錄存
浙紹裘慶元吉生校刊

統理十二經脈皆上循咽喉

咽主地氣地氣通於噤足太陰脈布胃中絡於噤故病則脘滿而噤乾邪客於足少陰之經令人噤痛不可內食無故善怒氣上走賁肝者中之將也取決於膽咽爲之使一陰一陽代絕此陰氣至心上下無常出入不知咽喉乾燥病在脾土手太陽之經循咽喉手少陽之脈循頸結缺盆令咽腫（素問）足太陰之正上結於咽足少陰所生病口熱舌乾咽腫上氣噤乾及痛陽明之脈上通於心循咽出於口足少陽之正上挾咽出頤頷（靈樞